

Ko e heigoa kia haaku ka taute ke lagomatai aki e tama haaku?

Kia Fakataugahua mo ia

Nakai fia loto fakaakoaga mata numela e tau tagata oti. Ka e fakaaoga he tau tagata oti e tau mata numela he ha lautolu a tau momoui he tau aho oti, ti ko e mena ia ne uho ai ke he moui he tama haau anoia, ke maama mo e kautū a ia ke he tau gahua mata numela. Ko e taha he tau puhala mukamuka lahi ke lagomatai aki e katoatoa he manako nei, ko e fakataugahua mo ia ke he haana a tau laliaga ke he tau mata numela. Tatai nakai e loa he tau magaaho ne lagomatai aki e koe a ia ke he tau gahua mata numela haana mo e tau magaaho totou tohi haau? Fakakite nakai e koe e fiafia mo e manako lagomatai haau ke he tau gahua mata numela ne tamai ke taute i kaina? Ko koe ko e fakafifitakiaga mahuiga lahi he tama haau ti ko e tau aga haana ke he tau mata numela, to liga ni ke tatai mo e haau.

Mukamuka lahi ke manako ke he tau tohi ne totou he tama haau, tau tala haana ne fa e tohi, mo e tau fefeua tino haana ne fa e fiafia ki ai he aoga. Lali ke manako pihia foki ke he tau gahua mata numela haana ne fa e fakaako ki ai.

Fakanogonogo ki a lautolu

Kua amaamanaki lahi e Matagahua Mata Numela (Numeracy Project) ke fakaohoohe e tau fānau ke manamanatu ke he tau puhala kehekehe ke fakamitaki aki e tau mena hagahagakelea, mo e maeke ke fakamaama age e tau mena ia ke he falu. Kaeke kua fakamaama he tama haau haana puhala ne tali aki e hūhū - FAKANOGONOGO. Liga to nakai tali e ia tuga e puhala ka tali aki e koe, ka e nakai pehe a ia kua hepe e tama. Amanaki ke fakaaoga he tama haau e tau lagatau kehekehe ke fakamitaki aki e tau mena hagahagakelea. Fakaohoohe a lautolu ke fakamaama e tau manamanatuaga ha lautolu. Ko e falu a magaaho, liga lata i a koe ke fakaaoga e falu koloa, tuga e tau lakau totou mata numela, po ke pene mo e laupepa ke fakakite aki e lautolu ha lautolu a tau manamanatuaga. Kia mautali a koe ke fakataitai e tau lagatau kehekehe.

Fakaata a lautolu ke gahua he tau mata numela

Hahā he tau mena oti e tau mata numela. Nakai mailoga e tau tau moui po ke makaukau he tama haau to hahā i ai hokoia e tau magaaho ke fakagahuahua ai e tau mata numela ha lautolu.

Kaeke kua lali e tama haau ke totou mata numela - totou mena foki a koe. Maeke i a koe ke totou e tau sitepe he hala papahi fale, numela he tau punua fakatino he fuga simeni, numela he tau motoka ne fakatemole i a mua, po ke ha mena he tau mena kua manamanatu a koe ki ai. Ko e lahi atu he tau totou mata numela he tama haau, to holo ki mua e mitaki haana.

Kaeke kua lali e tama haau ke lafilafi mata numela - lafilafi mena foki a koe. Tau mena mukamuka mo e mahani mau tuga e tau titipi i luga he laulau lafi ke he tau huki i luga he laulau, po ke tau mena ukauka fakatote tuga e tau totogi he tau koloa he fale koloa. Ua nimo ke utakehe foki he falu magaaho. Hūhū ke he tama haau ko e heigoa haana ne taute he tau gahua mata numela he aoga ti lali ke fakaaoga foki e tau mena ia he tau aho oti he haana a moui. Kaeke kua fakaako a lautolu he tau valavala mena (fractions), hūhū ke he tau valavala mena, "Ko e heigoa e vala he tau fanau i loto he magafaoa katoa ha tautolu?" "Ko e heigoa e vala he huhu ne toe?". To nakai ko e tau fakataitai ni hokoia a nai ma lautolu, ka ko e fakakiteaga foki ki a lautolu, ko e tau mata numela, felauaki mo e lalolagi 'mooli'.

Falu matagahua lalahi ma e tau mata numela hanai:

- Tau Tupe - totou mo e fuafua. Tau tupe tuku katofihui, tuku he fale tokatupe, fakaaoga he fale koloa....
- Fuafuaaga he tau mena - tau loloa, tau lau lalahi, tau matolu, tau valavala he kaitunu...
- O fenoga - totou e tau mata numela he tau fakatātā ma e tau fānau ikiiki, fuafuaaga he tau mamao mo e tau mafiti ma e tau fānau momotua.
- Tau pelē fefeua - Monopolī, Pigikō, tau pelē laupapa/mu, tau pelē pepa/suipi...
- Tau taimi/tau fakaholoaga fafati magaaho.